



# ÅRSRAPPORT GLOPPEN SOKNERÅD 2021

## 1. Gloppen sokneråd 2021

Berit Aasebø Hauge: Leiar i soknerådet og leiar av Arbeidsutvalet, AU

Hege Støylen Alme: Nestleiar, medlem i arbeidsutvalet, AU

Åslaug Haugset: Sekretær og medlem i Arbeidsutvalet (AU), medlem i Gudstenesteutvalet

Arne Høyland: Kasserar, medlem i Gudstenesteutvalet, medlem i husestyret for Sandane kyrkje

Bjørn Aurlien: Leiar i Fellesrådet

Oddhild Almenning Voll: Representant i Fellesrådet, medlem Trusutvalet, ansvarleg for konfirmantkapper

Eivind Kjerstad Nilsen: Leiar i Trusutvalet

Kjell Dann Mardal: Ansvar for dugnad på kyrkjegardane. Permisjon frå vervet heile 2021

Laila Bergheim Ommedal: 1. vara i soknerådet, har vore innkalla til alle møte, fast medlem frå 23.9.20

Oddvar Bjørlo: Varamedlem, har møtt fast som 1. vara til soknerådet frå 23.9.20, medlem i Diakoniutvalet

Gunhild Aabrekk Nedrebø: 3. varamedlem og medlem i Diakoniutvalet

Oddrun Alme: 4. varamedlem, ansvarleg for konfirmantkapper

Gjertrud Sundt Ravnestad: 5. varamedlem, varamedlem Fellesrådet

Einar Ove Kårstad: 6. varamedlem, ansvarleg for organisering av parkeringsvakter

Vidar Bjotveit: Sokneprest for Gloppen sokn, medlem av Arbeidsutvalet, Trusutvalet og Gudstenesteutvalet

På grunn av praktisk organisering var det ikkje så lett å få alle 4 i arbeidutvalet til å møtast samtidig, som konsekvens av dette har prest og leiar i soknerådet utgjort AU heile året.

## 2. MØTEAKTIVITET I SOKNERÅDET 2021

Gloppen sokneråd har hatt 10 soknerådsmøte og det har vore handsama 102 saker.  
(20.1., 18.2., 17.3., 21.4., 19.5., 16.6., 1.9., 5.10., 10.11. og 8.12.)

**Arbeidsutvalet** har hatt møte ei veke før kvart soknerådsmøte, det har vore frist for innlevering av saker til soknerådsmøtet dagen før møtet i Arbeidsutvalet.

**Soknemøte/årsmøte** for 2021 var 7.3.2021 i Vereide kyrkje.

## 3. VIKTIGE SAKER

### KYRKJELEG ORGANISERING

Den store saka dette året har vore høyring om kyrkjeleg organisering. Vi såg raskt at dette var eit omfattande arbeid og valde å setje ned ei arbeidsgruppe. Den var samansett av Vidar Bjotveit, Arne Høyland, Laila Bergheim Ommedal og Berit Aasebø Hauge. Gruppa hadde 4 møte, i tillegg deltok Arne Høyland og Berit Aasebø Hauge på ei samling i Nordfjord prosti om kyrkjeleg organisering, på Eid kyrkjetun 26.10.2021. Der hadde Ann Kristin Langeland, medlem av Müller-Nilsen-utvalet ei god orientering om arbeidet i utvalet. Vi fekk mange gode innspel som vi kunne ta med oss vidare i arbeidet vårt. Resultatet av arbeidet vart lagt fram og godkjent i soknerådet. Høyringsfristen var 1.12.2021. Høyringssvara er å finne på <https://kirken.no>.

### FORNYING AV SANDANE KYRKJE OG KYRKJELYDSDELEN

Også dette året har det vore arbeidd med fornying av Sandane kyrkje. Det har vore gjort mykje og godt arbeid av husestyret for Sandane kyrkje. Det har vore litt lite framdrift ein periode. Det er dialog med bispedømmet om vidare framgang i prosess og godkjenning av ombygging. Soknerådet har fått på plass ei byggjenemnd for Sandane kyrkje. I byggjenemnda sit Audun Mundal, Oddvar Almenning, Oddlaug Wiik Schjølberg, Sigmund Ommedal og Olav Bjørn Tystad.

### BARNEKROKEN I VEREIDE KYRKJE

Det har i lengre tid vore ynskje om å fornye «barnekroken» i Vereide kyrkje og dessutan rydde kyrkjerommet for benkar og anna utstyr som vert lite brukt. Eivind Nilsen og Åslaug Haugset i samarbeid med kyrkjeverja har hatt eit ansvar for dette. Biskopen har godkjent søknaden med premissar om at endringane vert tilpassa stil på interiør og fargebruk.

### GJEVARTENESTA I GLOPPEN SOKN

Kasserar Arne Høyland har arbeidd mykje med å få til ei fast gjevarteneste i kyrkjelyden. Den er no på plass. Det er laga ei brosjyre om gjevartenesta, denne har vore delt ut i samband med gudstenester. Dette er ei flott ordning for soknet. I 2021 fekk soknet inn 100 000 kr. til kyrkjelydsarbeidet. Dei som ynskjer det kan melde seg på kyrkja sine nettsider.

## STRATEGIPLAN

Det førre soknerådet laga ein strategiplan. Den vart revidert dette året. Vi såg på dette som eit så stort arbeid at det var naudsynt å setje ned ei arbeidsgruppe. Denne var: Vidar Bjotveit, Åslaug Haugset, Eivind Nilsen og Berit Aasebø Hauge. Vi utarbeidde eit utkast til strategiplan som soknerådet godkjende. Strategiplanen er for 2021 – 2024.

I møtet 8.12.21 evaluerte vi strategiplanen. Der stilte vi spørsmåla: «Kva er vi gode på?» og «Kva kan vi bli betre på?». Resultatet er ei god rettesnor i det vidare arbeidet i soknet. Evalueringa finn du saman med referatet frå møtet 8.12.21 på heimesida til kyrkja i Gloppe.

## LOPPERIET

«Lopperiet» med Berit Gloppestad og hennar medarbeidarar gjer ein stor og flott innsats for å samle inn pengar til arbeidet i kyrkja vår. Flott organisering av loppesalet og tilgjenge til å kunne kjøpe lopper gjennom heile året, samstundes får gjenstandar nye eigalar i staden for å bli kasta. Tusen takk for arbeidet de legg ned, håpar de finn motivasjon til å halde fram i mange år! Det har dette året vorte oppretta eit eige styre for Lopperiet. I det styret sit Arne Høyland, Berit Gloppestad, Else Tystad og Oddrun Alme.

## REDAKTØR I KYRKJEBLADET

Oddvar Almenning var redaktør for Kyrkjebladet til 31.12.2021. Han har gjort ein flott innsats gjennom svært mange år. Han har utvikla bladet både i format og innhald til det flotte bladet vi har i dag. Soknerådet er svært takknemlege for det gode arbeidet Oddvar har gjennomført. Det er svært mange som er spurde om å ta over, men alle har svart nei. No er det ei redaksjonsnemnd som har ansvaret.

## DUGNAD PÅ KYRKJEGARDANE

I samarbeid med kyrkjeverja har vi sett opp reglar for korleis dognader på kyrkjegardane skal organiserast.

## NYTT I 2021

- Simona Fraas Johnson har starta i stillinga som kyrkjelydspedagog.
- Malin Mølmesdal Åberg har 50% stilling som barne- og ungdomsarbeidar.

## 4. SOKNERÅDET HAR HATT ANSVAR FOR/ MEDANSVAR FOR I 2021

- Konfirmasjon dette året vart pga. smittesituasjonen og ynskje frå foreldra arrangert både haust og vår. Vereide kyrkje 30. mai, 2 gudstenester og 18. og 19. september, to gudstenester kvar dag. Gimmestad kyrkje 23. mai og 28. september, med ei gudsteneste kvar dag. Til saman vart det halde 8 konfirmasjonsgudstenester. Det vart synt stor velvilje frå prest og sokneråd for at alle skulle få ei fin opplevelse av konfirmasjonane.
- Medarrangør av utekonsert i Prestegårdshagen 26.6.2021, 95 deltakarar

- Gudsteneste på Almestøylen i samarbeid med grunneigararane 18.7.21
- Gudsteneste på Heradspllassen i samband med Sandanedagane. Gudstenesta vart halden i det store matteltet. Der var det heilt fullt og ute sat det mange, om lag 130 personar deltok.
- Medarrangør av «Matteusevangeliet ord for ord», torsdagssamlingar i Sandane kyrkje ved Sigurd Vengen. 8 samlingar i 2021. I alt 16 samlingar vinteren 2021/2022.
- Medarrangør av 50-årsjubileum for Kyrkjebladet. Jubileumsfest på Nordfjord folkehøgskule laurdag og festgudsteneste i Vereide kyrkje søndag.
- Konfirmantjubileum 2.-3.10.21. Det vart arrangert for 2 kull sidan det vart avlyst i 2020.

## 5. DELTAKING PÅ ANDRE MØTE OG ARRANGEMENT

- 26.10.21 deltok Arne Høyland og Berit Aasebø Hauge på ei samling i Nordfjord prosti om kyrkjeleg organisering, på Eid kyrkjetun.
- Trusutvalet arrangerte inspirasjonssamling for frivillige medarbeidarar i det kontinuerlege barne- og ungdomsarbeidet i sokna 14.9.21.

2020 vart eit annleis år etter at Covid-19 inntok landet vårt, og vi var spente på om det ville halde fram i 2021. Vi slapp å lure lenge, det vart nedstengingar og smittevernreglar av ulikt slag gjennom heile året. Korleis skulle vi no organisere kyrkjelydsarbeidet vårt for skape gode møteplassar og gode relasjoner for å kunne formidle den gode bodskapen i trua vår?

Vi vart tidleg einige om at streama gudstenester og andre digitale formidlingar ikkje var vegen å gå, vi ville skape fysiske møteplassar innanfor smittevernreglane så godt som det let seg gjere.

For å nemne noko, så vart det avhalde i alt 8 konfirmasjonsgudstenester, der skapte Håvard Nordvik og Dorothee høgtidsstemning med flott musikk på alle. I påska var det opa kyrkje der Håvard Nordvik og Dorothee hadde konserter. Utugudstenester på TIN-camp både helgetorsdag og 1. pinsedag i nydeleg vårver med godt frammøte. Konsert og gudsteneste i prestegardshagen 26. og 27. juni, 95 på konserten laurdag, 89 frammøtte i nydeleg ver til gudsteneste søndag der tre born vart døypt og soknerådet arrangerte kyrkjekaffi. Nemnast må også gudsteneste på Almestøylen i juli og gudsteneste på Heradspllassen i samband med Sandane-dagane, der om lag 130 deltok.

Nattverdsgudstenestene som Eivind Nilsen har hatt fleire søndagskveldar. Lovsanggruppa som stiller opp og formidlar bodskapen på ein flott måte. Vi må ta med dei flotte elevane frå folkehøgskulen som jamleg er med som deltakrar og ved nokre høve har oppgåver i gudstenestene. Vi set stor pris på alle ungdomane som fyller kyrkjebenkane. Stor takk til alle medliturgar som stiller opp ved gudstenestene våre og gjer ein god og viktig jobb!

Vi har hatt løysingsorienterte prestar, andre tilsette og frivillige, som har stilt opp og gjort ein god jobb for «å halde hjula i gang». Vi har fått gjennomført mykje. Stor takk til alle som har vore deltakrar på ulikt vis!

Vi fekk tilsett både kyrkjelydspedagog og barne- og ungdomsarbeidar, det har gjort at det vart betre kår for det kontinuerlege barne- og ungdomsarbeidet vårt. No ser det ut som at covid-19 er i ferd med å sleppe taket, og vi håpar og trur at situasjonen vil kunne kome tilbake til det normale etter kvart.

Sandane 7.2.2022

Berit Aasebø Hauge

Leiar i Gloppen sokneråd

## Statistikk for Gloppen sokn 2020

2020 og 2021 har vore to år med korona, det har fått konsekvensar for mange av tala i statistikken.  
Vi har teke med tala frå 2019 for å vise korleis stoda var i det vi tenkjer var eit normalår.

	Døypte	Deltakarar søndagsgudst.	Deltakarar andre gudstenester	Deltakarar gudsteneste tot.
2021	26	4184	948	5132
2020	30	3116	931	4047
Differanse 20/21	-4	1068	17	1085
2019 (Normalår)	33	8336	1295	9631

	Søndags- gudstenester	Andre gudstenester	Nattverds- gudstenester	Nattverds- deltakarar
2021	80	17	41	1286
2020	46	27	37	1476
Differanse 20/21	34	-10	4	-190
2019 (Normalår)	83	14	52	2294

	Gudstenester totalt	Gjennomsnittleg deltaking	Gjennomsnitt hovudgudsten.	Gjennomsnitt nattverd
2021	97	55	52	31
2020	73	55	68	40
Differanse	24	0	-16	-9
2019 (Normalår)	97	99	100	44

	Konfirmantar Totalt	Offer totalt	Innmelde	Utmelde	Vigslar
2021	42	153381, -	4	12	4
2020	44	161222,-	1	4	3
Differanse 20/21	-2	-7841,-	3	-8	1
2019 (Normalår)	56	369407,-	5	17	10



Sandane 03.02.2022

Husestyret ved leiar Arne Høyland

## Årsmelding 2021 frå husestyret for Sandane kyrkje

### **Styret har sett slik ut:**

Leiar: Arne Høyland

Nestleiar: Paul Rune Daviknes

Styremedlem: (vakant)

Sekretær: Liv Djupegot

### **Aktivitetar/møte:**

- Våren 2021 saga vi ned og fjerna furutrea mot parkeringsplassen ved kyrkja.
- I mai arrangerte vi dugnad på uteområdet ved kyrkja. Vi raka og rydda og sådde i hola der furutrea hadde stått.
- I juni monterte vi snøfangar på klokketårnet.
- På hausten pussa og beisa vi utebenkane/rasteborda.
- 9. november. Styremøte der vi gjekk gjennom stoda for oppussing og ombygging av Sandane kyrkje. Vi såg gjennom brevet frå biskopen i Bjørgvin og dei innvendingane han hadde til planane. Vi var også på synfaring i kjellaren og såg på oppussingsarbeidet som har vore gjennomført der.
- Liv Djupegot og Paul-Rune Daviknes sa frå seg attval og soknerådet må velje 2-3 nye personar som kan sitje i husestyret frå 01.01.2022. Takk til dei begge for 7 års trufast teneste i husestyret.

Sandane 03.02.2022.

Husestyret ved leiar Arne Høyland

# Årsreferat frå diakon

Gloppen kyrkjelege fellesråd 2021

2021 bar også preg av smittevern-restriksjonar, men samstundes har det vore gode høve til å utøve diakoni.

## Sorggruppe, sjælesorg og heimebesøk

Sorggruppa med fem deltagarar som starta i november 2020, heldt fram til ut februar 2021. Det var fire samlingar på nyåret 2021, og til saman åtte samlingar. I tillegg hadde vi ei «etterpå-samling» i september, etter ønske frå deltagarane. Deltagarane gav uttrykk for at det hadde vore godt å møtast, og at dei hadde utbytte av samlingane. Ny sorggruppe med fem nye deltagarar starta opp i slutten av oktober. Fram til jul hadde vi fire samlingar. Ein god med-leiar har vore med i begge gruppene. Eg hadde samtaler med deltagarane før oppstart i haust, og nokre telefonsamtaler underveis. I 2021 hadde eg 16 sjælesorgssamtaler og 10 heimebesøk (alle tre sokna). Med sjælesorg meiner eg samtaler som er konsentrert om meir djuptpløyande emne i livet til den andre. Tidvis var eg forsiktig med heime-besøk med tanke på smitte og restriksjonar. Har også hatt telefonar til ein del sørgerande og andre.

## Samlingar på institusjonar

Våren 2021 kunne vi ikkje ha samlingar på institusjonane. Ei ute-songstund ved Omsorgssenteret vart planlagt saman med hyggestund-gjengen, og det la seg til rette å ha den i juni. Lydteknikarar bidrog òg.

I hausthalvåret hadde vi fem hyggestunder på Omsorgssenteret. I tillegg steppa eg inn for prest på ei andakt. Nokre avlysingar vart det pga. lokal smitte, før dei eldre fekk 3. vaksine. Hadde også ei andakt på Gotatunet der diakoninemnda stod for samlinga. I Breim sokn var eg ikkje på bufellesskapa i 2021; soknepresten hadde kontakta der, og det vart lite som kunne gjennomførast. På Løkjatunet hadde eg nattverdsgudsteneste i november saman med Dorothée og diakoninemnda.

Som eit koronatiltak laga vi til ei påskehelsing til eldre på institusjonar i alle tre sokna.

## Gudstenester

Diakonien har sitt utspring i gudsteneste-fellesskapet, og ut ifrå stillingsinstruks skal eg vere med på ein del gudstenester. Eg var delaktig i sju gudstenester + éi opa kyrkje-hending i Gloppen sokn, to i Breim kyrkje, og to i Hyen kyrkje (gudst. langfredag vart avlyst). På seks av gudstenestene hadde eg preika. Verdsdagen for psykisk helse vart markert i éi preike. Elles var eg medliturg i éi gravferd i Breim. Hadde eitt soknebod.

## Andre samlingar

Det vart så vidt mogleg å gjennomføre samling på den internasjonale bønedagen for kvinner, 5. mars. I lokalkomiteen sat Grete Tennebø, Karin Urke og underteikna. Fleire vart involverte.

Våren 21 vart det åtte samlingar om søndagens bibeltekst og salmesong. Frivillige leia dei flest samlingar, men eg var også involvert i nokre. Opplegget vart sett på pause i haust pga. Matteus-samlingane.

02.09. kunne vi endeleg gjennomføre ein temakveld i Breim (utsett frå nov. 20). Eg snakka om temaet «Når trua krasjar i livet». Ei bibelgruppe i Breim var delaktige i planlegging og gjennomføring.

## Andre prosjekt og oppgåver

Utover i 2021 hadde eg kontakt med Frivilligsentralen m.fl. om samarbeid rundt besøksteneste. Vi hadde to møte. Tanken er også å på sikt samarbeide om kursing av frivillige. Eg utarbeidde ei retningslinje og brosjyre for besøksven-tenesta. Det har ikkje lykkast å få nye besøksvener enno. Men den skriftlege infoen er eit grunnlag, og så trengst det meir aktiv spørjing, noko eg ikkje rakk i ein bra

hektisk haust.

I starten av 2021 vart eg tilsette sin representant i redaksjonen for Kyrkjebladet. Har også skrive stoff til kvart nummer. Stabsmøte kvar veke, kontakt med diakoninemndene, organisering av frivillige ved hyggestunder og andakter på Omsorgssenteret, litt nettside-arbeid, utforming av brosjyre for gjevarteneste, PR-arbeid for sorggruppe var også blant gjeremåla. Det vart ikkje inspirasjonssamling våren 21 grunna restriksjonar, men i november starta planlegginga av insp.samling våren 22. For eiga fagleg utvikling har eg delteke i «arbeidsveiledning-gruppe». Har elles delteke på nokre webinar.

Sandane 7.2.2022

Ingebjørg Isane Fure

## Rekneskap for kyrkjebladet 2021

### Inntekt

Bladpengar + minnegåve	246977
Offer i Vereide kyrkje 25.10.	9755
Annonser	76000
Til gode frå trykkeriet	13220

### Utgift

Trykking	225336
Grafisk utforming	162491
Porto	12131
Jubileumsfest	67246
Diverse	537
Sum	345952
Underskot	<b>121789</b>

## Kyrkjebladet 50 år – Jubileumsfest

Nordfjord Folkehøgskule	35186,50
Coop Extra Sandane	326,50
Blåsekvartett	8002,00
Gloppen Hotel	1697
Køyregodtjerdsle Byfuglien	489
Repix trykking av programhefte	2482
Grafisk utforming	19063,25
Sum	<b>67246,25</b>

# KYRKJEBLADET SI ÅRSMELDING JUBILEUMSÅRET 2021

## **Redaksjonen:**

Oddvar Almenning, redaktør

Harald Aske for Gloppe sokn, distribusjonsansvarleg

Vidar Bjotveit, sokneprest

Gunn Hole for Gloppe sokn

Arvid Jordanger for Breim sokn

Tore Myklebust, sokneprest

Ingebjørg Isane Fure frå staben

Kurt Djupvik for Hyen sokn

Korrekturlesar: Rønnaug Ryssdal

## **50-årsjubileum**

Dette året har vore prega av at det er 50 år sidan bladet starta å kome ut. I kvart nummer har det vore trekt fram stoff frå soga, og nummer 5 vart vurdert som sjølve «jubileumsnummeret», der ein ikkje hadde noko anna tema ved sidan av jubileumstemaet. Dette førte til at bladet auka i omfang. Kvart einskild nummer blei større enn før, og sidetalet vart samla 404 fordelt på seks utgåver, medan det dei siste åra har lege på i overkant av 300 sider. Men auka storleik gjev auka kostnader, og rekneskapet syner eit underskot.

## **Jubileumsfest**

Redaksjonen valde seg ein eigen komite som la opp til ein «takkefest» for medarbeidarane i kyrkja, folkevalde, tilsette og frivillege (skribentar, leverandørar av bilde, barnesider, kryssord etc. og alle som distribuerer bladet). Nordfjord folkehøgskule var medarbeidande leverandør av festlokale og festmat. Gjestetalarar var biskop emeritus Haugland Byfuglien og Sverre Folkestad. Det kom om lag 100 gjester, og redaktøren meiner festen var vellukka! Takk til komiteen!

## **Ny design**

Visse «grep» har vore gjort med forma på bladet: Sidebreidda er auka litt, omslaget er trykt på tjukkare papir, og innmaten på tynnare papir enn før, skrifta er i hovudsak noko større enn tidlegare og andre «små» endringar er komne til. (Døme: Farge på undertitlar og i sitat, noko som før alltid var i svart). Mest synleg for den vanlege lesar er truleg at framsida er endra. Frå og med nr. 1 har det vore brukt eit bilde som dekker heile framsida, utan margar. («Utfallande» på alle kantar). Dette medfører at all tekst på framsida må plasserast PÅ bildet. For jubileumsåret valde vi å bruke foto av kvart av våre seks kyrkjehus som motiv, og det blei gjennomført. Nokre av bilda er nye og tekne til dette bruk, andre kom opp frå private «arkiv». Nytt var då og at noko av innhaldet i bladet blir trekt fram til førstesida. Dette er ein måte å kommunisere på som er i pakt med trendar i tida, meiner redaksjonen, og stilten skal halde fram om motiv-tema blir endra.

## **Typisk «Kyrkjebladstoff»**

Å førehandsmelde det som skjer i gudstenestelivet, i kyrkjelydsarbeidet og i kyrkjhusa elles, å lage reportasjar om ting som har hendt, og å kommentere besøk, tiltak, gudstenester eller konsertar, har vore «standard» også i år. På leiarplass og på andre måtar prøvar vi og å aktualisere, opplyse eller diskutere aktuelle kyrkjesaker, som i år spørsmålet om framtidig kyrkjeleg organisering. Til påske og jul likar vi å ha kryssord og quiz og anna snadder, og ved dei høgtidene har vi kvart år trekt fram verk frå verdenskunsten for å kaste lys over innhald i høgtida.

Elles er det eit mål å lage «møte med menneske», og særleg viktig har det vore i eit jubileumsår. Dei prestane som har vore med å gje ut bladet, fekk ein omtale, skreiv ei helsing eller blei intervjuet. Av redaksjonsmedlemer elles skreiv i vi om desse: Jørgen G Hauge, Johannes Klungrehaug, Oddlaug Vereide, Jorunn Eide, Inge Pedersen, Kåre Holvik, Åshild Roset, Aslaug Heimset Larsen, Borgny Haug Aa, Marie Sælensminde Rygg og Anders Rinde. Skrivande medarbeidarar elles, som Martin Ø Ommedal og Styrkår Almenning fekk omtale, og vi henta fram frå soga profilar som John Austrheim og Olav Hestenes. Elles har vi i 2021 hatt «møte med» nye medarbeidarar som organist Dorothee Raschwitz, kyrkjelydspedagog Simona Fraas Johnsen og barne- og ungdomsarbeidar Malin Mølmesdal Aaberg, med avtropande redaktør, og med Jakob Sande Haugset som deltok på klimakonferansen i Glasgow.

## **Faste spalter**

\*Andaktene vart i 2021 utvida med ei side, ut frå ideen om å skaffe illustrasjon særskilt laga for kvar andakt, gjerne levert av profesjonelle illustratørar. Kvar illustrasjon fekk ei heil side, med ei heil side til teksten. Ikkje alle teiknarar var proffe, men andaktene blei levert slik: Nr 1: Karen Margrete Eikenes Mestad: Kyrie eleison. Illustrasjon Oddvar Almenning. Nr 2: Rolf Schanke Eikum: Seier'n er vår. Illustrasjon Oscar Jansen. Nr. 3: Eivind Nilsen: Gud på stedet. Illustrasjon Ståle Almenning. Nr 4: Fritz Schjølberg: Kunsten å mislykkes. Illustrasjon Anders Færevåg. Nr 5: Vidar Bjotveit: Lat oss jubla og glede oss no! Illustrasjon Oddvar Almenning. Nr. 6: Halvor Nordhaug: Ei kroppsleg jul. Illustrasjon Ståle Almenning.

\*Leiarartiklane brukar vi å ta ansvar for i redaksjonen, staben eller mellom soknerådsleiarane. Artiklane var i år skrivne av pensjonert prest Asbjørn Gjengedal; kyrkjeverje Audun Mundal; soknerådsleiar i Hyen, Kurt Djupvik; soknerådsleiar i Gloppen, Berit Aasebø Hauge; sokneprest i Breim, Tore Myklebust; og sokneprest i Gloppen, Vidar Bjotveit.

\*«Skattejakt i salmeboka» går på omgang i redaksjonen. I nummer 5 blei det ikkje skattejakt, men elles ser lista slik ut: Vidar Bjotveit, Arvid Jordanger, Oddvar Almenning, Harald Aske og Ingebjørg Isane Fure.

\*Spaltistane er ei rekke personar som er spurde om å leve sine skrålbitikk eller tilrop frå «sidelinja», og i 2021 ser rekka slik ut: Grethe Lysen, Laila Bergheim Ommedal, Jorunn Eikenes, Ragnhild Birkeland Hope, Marianne Bakketun og Morten Leirgul.

\*Asbjørg Apalset leitar opp klipp frå litteraturen som ho sender oss trufast til kvar utgåve.

\*Min salme lever sitt eige liv ved at den som skriv, vel ut og utfordrar ein person, og sender stafettpinnen vidare til denne. Slik blei lista i 2021: Kirsti Bjotveit, Karoline Aldis Bjerkeset, Erling Sande, Inger-Johanne Hafstad Gjengedal, Torunn Ommedal Aandstad og Gro Eimhjellen Sæten.

\*Barnesider i jubileumsåret har vore leverte av Gunn Hole, Joveig Almenning Døvle, Harald Aske, Olaug Meland Eikenæs, Aud Marit Skarrebo Holmen og Oddvar Almenning.

## Breidt stofftilfang

Vi har oppbyggeleg stoff som andakter og andre tekstutleggingsar, og vi har «tidtrøyte» som vitsar, quiz og kryssord. Vi ynskjer å famne vidt og pløye djupt. Kyrkja er for heile folket, og det skal speglast i Kyrkjebladet!

## Produksjon og distribusjon

Bladet er formgjeve av Bjørnar Aske i Innholdspartner her på Sandane og er trykt i United Press i Riga, Latvia. Bladet blir distribuert av ein frivilleg stab, leia og organisert av Harald Aske. Bladet blir lagt i alle postkasser i Gloppen. I tillegg har vi om lag 150 abonnentar utanom kommunen, og dei får bladet i posten. Utan dei frivillede distributørane kunne vi ikkje ha gitt ut eit såpass stort og velutstyrt blad!

## Økonomi

Vi viser til rekneskapstala som blir framlagde i eige dokument, og har elles desse kommentarane:

Rekneskapet syner eit forbruk av nesten 470 tusen, med eit underskot på over 120 tusen kroner. Dette er meir enn berekna, og krev ei forklaring:

Generelt viser soga at Kyrkjebladet har svinga mellom overskot og underskot i alle år. I 2019 var overskotet 120 tusen , og året etter 50 tusen kroner, medan 2018 syner eit underskot på 119 tusen. Jubileumsåret er grunnen til at bladet blei ekstra omfangsrikt i 2021. Auka sidetal gjev proporsjonalt auka kostnad med omsyn til både formgjeving og trykking. Vi hadde med oss eit overskot frå tidlegare år, og våga å utvide sidetalet. Jubileumsfesten kjem så i tillegg samanlikna med andre driftsår, ein kostnad på 67 tusen kroner. I ettertid må ein seie at festen blei noko meir kostbar enn ein hadde tenkt over under planlegginga. Det rettaste er vel å seie at komiteen og redaksjonen hadde for dårleg budsjettgrunnlag for arbeidet. Det som har vore av budsjett for sjølve kyrkjeblad-produksjonen har ikkje vore styrande for redaktør og redaksjonen elles. Det er i det heile slik at så lenge inntektene kjem på den måten dei gjer, kan ein alltid håpe på auke i innbetalingane når bladet blir større og betre. Men slik er det ikkje alltid. Redaksjonen bør i framtida arbeide for auka inntekter og betre kontroll med utgiftene.

**Takk til alle som skriv, distribuerer, fotograferer, les, gjev tilbakemeldingar og på andre måtar viser interesse for Kyrkjebladet.**

Vereide februar 2022      Oddvar Almenning

## TÅRNAGENTAR



## Årsrapport for trusopplæring 2021

Året 2021 har vore prega av Korona og derfor mange avlysingar. Det vi har klart å gjennomføre dette året er:

**4-årsbok:** Det var 21 à 35 born som fekk utlevert 4-årsbok. (Her var ein på besøk frå Trondheim, skal flytte hit). Samlinga var laurdag 16. oktober i Sandane kyrkje. Saman med 4-åringane lagde vi krone og fekk høyre om Jesus som metta 5000. Ungane fekk lære «Kongenbarna». Vi song igjennom ein del av salmane vi skulle bruke under gudstenesta søndag. Vi avslutta laurdagen med å ete graut. Søndag 17. oktober gjekk 4-åringane inn i prosesjon. Opplevde at ungane var med og hadde ein god oppleveling medan dei var i kyrkja.

Malin og eg hadde med oss 3 frivillige og 3 konfirmantar. Det var til god hjelp! I tillegg var alle foreldra elle besteforeldre tilstades heile tida.

**Lys vaken:** 6. klassingane frå Nordstranda skule og Sandane skule var inviterte til Lys Vaken og overnatting i Vereide kyrkje frå 4. til 5. desember. Det var 24 ungar som møtte opp. Ein var ikkje i form og ville heim igjen, så det var 23 som overnatta. For å lære oss namna til ungane hadde vi ein bli-kjent-aktivitet. Vi kasta eit næste med tråd til kvarandre og sa namnet vårt og noko vi liker å gjere. Symbolet med aktiviteten var å vise at alle heng i saman på ein eller annan måte. Ungane lærte seg «Lys Vaken»-songen. Vi skulle sjå ein video om å velje sjølv og den miskunnsame Samaritan. Eg fekk ikkje lyd på videoen, så vi måtte berre gå vidare. Ungane fekk pizza som var bestilt frå Mona Lisa. Etterpå vart ungane delt inn i grupper og lagde klar bønestasjonar, og nokre jobba med dramatisering til preiketeksten. Vi var ute ei god stund og leika 50-leiken. Mange med godt konkurranse instinkt. Då vi kom inn åt vi bollar og drakk kakao. Ei av dei frivillige medhjelparane las «Papa Panov» då ungane var komne i soveposane. Søndagen etter frukost øvde vi på det vi skulle gjere under gudstenesta. Etterpå rydda alle saman kyrkja så den var klar for gudstenesta.

Det var vanskeleg å få foreldre til å stille på som brannvakter. Det var heller ingen frå soknet eller tilsette som sov i kyrkja. Natta gjekk bra og ungane sov litt.

To frivillige frå soknerådet var med og hjelpte Malin, Dorothee og meg heile kvelden. Den eine hadde hovudansvar for maten. Det var også ein som kom og hjelpte oss under planlegginga av bønnevandringa. Det var til stor hjelp. Vi hadde ein far som var der og hjelpte oss på kvelden.

Ser i ettertid at denne aktiviteten er viktig å planlegge tidleg, for å få nok frivillige med på laget.

**Babysong:** Vi har hatt 6 samlingar med babysong sidan 7. oktober og fram til jul. Det har vore varierande kor mange som har vore med kvar gong. Det har vore 14 babyar med foreldre innom dette semesteret. Det har vore flest frå Gloppen sokn som har vore med. Kvar gong har det vore i snitt 4 babyar. Det har også gått ein del sjukdom blant babyane, som har gjort at fleire ikkje har kunna møte.

Med meg har eg hatt 3 faste pensjonistar som har laga klart til lunsj. Det har vore til veldig god hjelp.

Februar 2022

Simona Fraas Johnson

# Årsmelding for Vereide kyrkjekor 2021

Årsmøtet i 2020 vart halde på ei korøving i Vereide kyrkje tysdag 31. august 2021 kl. 20.00.

Årsmøtet konstituerte seg på vanleg vis.

Styret dette året har vore:

- Audun Mundal, leiar
- Harald Aske, nestleiar
- Harald Kjær, sekretær
- Anders Rinde, kasserar
- Inger Lise Engelstad, styremedlem.
- Vara: Solveig Standal Rygg og Ann-Kristin Fløtre. Solveig har møtt fast som vara for Inger Lise i haust
- Revisor: Terje Sand
- Valnemnd: Berit Aasebø Hauge og Kirsti Bjotveit
- Blomehelsingar: Karin Urke



2021 blei, til liks med 2020, eit veldig spesielt år. I fleire periodar har det vore full nedstenging eller så store restriksjonar at vi ikkje har hatt øvingar i det heile tatt.

**Styremøte:**

Styret har hatt fem styremøte dette året og handsama 18 saker. Dette har også vore eit spesielt år og ein del av aktiviteten har blitt halde på eit lavnivå.

**Korøvingar:**

På trass av pandemien klarte vi å halde i gang nokre korøvingar, men vi måtte stenge ned på våren og seint på året. Vi starta opp att med øvingar 2. februar, men måtte halde god avstand med 2 meter avstand og maks 10 stk. i kvar gruppe. Vi hadde to grupper som øvde kvar for seg.

Øvingane på hausten starta opp att i veke 34, med strenge koronareglar. Vi øvde først fram til festkonserten 3. oktober. I veke 42 flytta vi korøvinga til Sandane kyrkje. Dette for betre øvingsakustikk og for at det er kortare veg for mange. Etter dette blei det korøvingar fram til julekonserten, som blei avlyst på grunn av nye koronarestriksjonar. Siste øvingsdag var 7. desember.

**Komedlemmer:**

I 2021 har vi fått ein ny medlem, Anita Sande på sopran. Vi har også fått ein ny bass, Anders Rinde, som heldigvis vil vere med vidare i bassrekka. Der var ein del som måtte melde forfall til store delar av året i år også på grunn av C-19 restriksjonar på jobb og pga. helse. Dagny takka for seg på slutten av året.

**Status ved dette årsmøtet:**

8 sopranar, 8 altar, 2 tenorar, 5 bassar og 1 dirigent=24

**Dette var vi med på i 2021:**

- 3. januar, gudsteneste i Vereide kyrkje der vi markerte Dororhee som ny dirigent
- 6. juni song vi på gudsteneste i Vereide kyrkje
- 3. oktober, festkonsert i Vereide kyrkje (den utsette konserten til Anders)

- 24. oktober, gudsteneste i Vereide kyrkje, 50-årsjubileum for Kyrkjebladet
- 7. november song vi på helgemessegudsteneste i Gimmestad kyrkje
- 16. november var det festmarkering for Anders på Gloppen Hotel
- 19. desember skulle det vore julekonsert, denne blei avlyst



*Harald Kjær delte ut gave til Anders frå koret der alle hadde signert på baksida.*

**Konsert “Wachet Auf” i 2020** som eigenteg var meint å vere avslutningskonserten til Anders, var først planlagt i juni, så utsett til hausten og 27. september, så til april 2021, alle pga C-19. Til slutt fekk vi dette til 3. oktober, med publikum i salen.



*Arkivfoto (foto: Gloppen musikkfest)*

**Velkommen til Dorothee.** 3. januar 2021 song kyrkjkoret Dorothee velkommen til oss på hennar første gudsteneste som kantor i Gloppen. Dette var den siste gudstenesta i 2021 der det kunne vere ei nokolunde normal gudsteneste.

#### SONGAR BRUKT I 2021

Det hev ei rose sprung	Praetorius
Rop ut med fryd	Nystedt
Wachet auf BWV 140	Bach
Mine Kjære	Tønsberg
Guds kyrkje syng kring vide jord	Vulpius/Overøye
Den vakre, klare sommerdag	Ødegaard
Hvor elskelige er dine boliger	Sommerro
Verleih uns Frieden	Mendelssohn Bartholdy
Fra pilgrimsmesse	Hovland
Julesong	Ryssdal



## VEDLEGG

### Kristent barne- og ungdomsarbeid for alle born og unge i soknet vårt, drive av ulike organisasjoner

#### KFUK/KFUM SANDANE

1.

#### Ope hus

31 ungdommar er no registrerte som medlemmar i Ope hus. Tal medlemmar i 2020 og 2021, gjorde at vi mottok 18 000 kroner i frifondmidlar på slutten av året i 2021. Dette kjem godt med til fornying av utstyr, lokale og til utgifter knytt til arrangement. Det at store delar av lokala i kjellaren har fått seg eit "løft" både når det gjeld måling, møblar, lys og varme, aukar trivselen både for ungdommar og medarbeidarar. Dette er vi svært glade for.

Vi hadde fem klubbkveldar på våren og fjorten på hausten. Det har vore kontakt med smittevern-ansvarleg i kommunen gjennom året. Vi valde å ha tilbod for ei aldersgruppe, 9.klassingar/konfirmantar. Desse er ei felles gruppe på skulen. Vidar Bjotveit har vore med som leiar. Det har vore positivt sidan han kjenner konfirmantane frå undervisninga, og sidan dette har vore ein del av tilboden knytt til konfirmanttida. Vi har elles trufaste medarbeidarar som legg til rette og som er tilgjengelege i miljøet. To ungdommar frå Firda vidaregåande skule er leigde inn som leiarar. Ungdommane er stort sett sjølvgåande i aktivitetane. Det verker som dei set stor pris på å få vere ilag og sjølv velje kva dei vil gjere. Det har vore stor aktivitet i kjellaren med biljard, bordtennis, skyting med luftgevær, air-hockey med meir. I biljardrommet har det blitt veldig fint med stilige møblar plassert i fleire sitjegrupper. Det meste av aktivitetene går føre seg i kjellaren, men av og til er det brett-spel i peisestova. På grunn av smittevern har ungdommane fått servert gratis pizza i eit fellesmåltid. På slutten av året starta vi med betaling igjen. Siste gong før jul vart det servert graut. Som avslutning på kvar kveld samlast alle i kyrkjerommet til fast rituale med lesing av bøner og lystenning. Jorunn Eikenes har utarbeidd "Regnbogebøner" som har blitt ein del av eit felles kveldsrituale. Lys i ulike fargar vert tent for kvar bøn. Dette har vore rolege, fine stunder.

Framover har vi ønskje om å igjen bli eit tilbod for fleire aldersgrupper. Vi tek gjerne imot innspel på korleis få fleire til å nytte seg av tilboden. (Kontaktperson Ingrid Bakketun, tlf 90781222.)

Jorunn Høyland  
Leiar KFUK/KFUM

## 2.

### Sandane barnegospel 2021

Sandane barnegospel har dette året vore i full gang igjen. Ved å øve i det store kyrkjerommet og ved at folk har vore flinke til å halde seg heime ved symptom, har det gått fint trass pandemien. Våren 2021 hadde vi øvingar annankvar onsdag og frå hausten 2021 har vi hatt øving annankvar tysdag. Vi har to dyktige dirigentar frå musikk- og dramalinja på Firda vgs., Louise Tveito og Ingrid Lade. Dei er til stor glede både for ungane og føresette. Anne Marie Bø Bakke er vaksenkontakt. I tillegg har Ingrid Sofie Bakke valt hjelpeleiar som konfirmantgruppe og er med og hjelper til kvar øving. Peder Andreas Bakke stiller også opp som praktisk hjelpar når han har høve til det.

Det var dessverre ikkje muleg med nokre framføringer på våren, men vi hadde ei kjekk sommaravslutning på Myra saman med foreldre og føresette og nokre frå styret i Gloppe KFUK-KFUM. Der hadde koret ein minikonsert for dei frammøtte og det var servering og grilling av pølser og anna, kake, saft og kaffi.

Hausten starta med ein stor og flott kick off på Operahuset på Nordfjordeid. Det var Sogn og Fjordane krins av KFUK-KFUM som arrangerte barnefestival for barnekor og andre barn frå Sogn og Fjordane og Sunnmøre 4.september. Over 100 barn og unge frå 4-12 år deltok på dette flotte arrangementet for små og store denne dagen. Det var mange kjekke aktivitetar både ute og inne, og eit stort trekkplaster for både små og store var å få høyre og synge saman med MGPjr-vinnarane Oskar og Josefine.

Smittevernreglane har endra seg stadig dette året og denne hausten var det endeleg muleg for andre å høyre Sandane barnegospel. Då deltok vi på ei familiegudsteneste i Sandane kyrkje. I desember var det litt innstrammingar igjen. Men vi fekk ha ein minikonsert for foreldre, føresette og nokre andre inviterte på siste øvinga før jul (maks 50 publikum). Då hadde også dirigentane tatt med vennar frå musikklinja som stilte som band til koret. Det var stor stas!

Det har vore god oppslutnad om koret. Sjølv om folk har vore flinke til å halde seg vekke ved symptom, så har det gjennom våren vore 20-25 barn mellom 4 og 9 år på kvar øving og på hausten har det vore over 30 barn som har vore med i koret. Dette er eit viktig og godt barnearbeid i kyrkja.

Sandane, 3. februar 2022

Anne Marie Bø Bakke, vaksenkontakt

## SØNDAGSSKULEFORBUNDET

### Søndagsskulen på Vereide 2021

Vi måtte avlyse nyttårsfrukosten og samlingane i januar og februar.

21. mars hadde vi utesøndagsskule med svært mange frammøtte. Då hadde vi ei påskevandringsløype i området rundt Haugtun med svært mange fine postar og aktivitetar. Vidare utover våren hadde vi tre utesøndagsskular (25.4., 9.5., 13.6.). På den siste søndagsskulen før sommarferien fekk vi takka dei fire hjelpeleiarane våre som var russ dette året, og som dermed ikkje kunne vere med som hjelpeleiarar lenger. Dei har alle vore med som leiarar sidan dei begynte på ungdomskulen, altså i seks år. Det var Sunniva Nyheim, Ove Hjelmeset, Mariann Husevåg og Jenny Skrivarvik. Sistnemnde tok seg eit år til i Gloppe, så henne fekk vi ha med vidare til hausten også.

På hausten hadde vi seks søndagsskulesamlingar (5.9., 19.9., 3.10., 31.10., 14.11., 28.11.). Til den samlinga vi hadde 1.søndag i advent hadde Åslaug Sande Haugset laga eit eige julespel som vi starta å øve på denne dagen. Dette fekk vi dessverre ikkje framføre sidan vi også dette året måtte avlyse Julefesten på folkehøgskulen 3. juledag. Vi håper vi får bruke det i 2022.

Februar 2022

Kari Rygg Leirgul

### Sandane søndagsskule

Søndagsskulen har ikkje hatt eigne samlingar dette året pga. korona. Sandane kyrkje har ikkje vore brukta til gudstenester. Men vi har vore delaktige og medhjelparar under nokre gudstenester i kyrkja. Det har vore vårt arbeid i 2021.

Februar 2022

Kirsti Bjotveit

## NORMISJON

### Årsrapport Sandane Soul Children 2021

Pga. pandemi hadde vi ikkje øvingar våren 2021.

Det har vore ca 15 barn/ungdomar innom øvingane i haust. 7-9 b/u pr øving.

Vi starta opp att koret i oktober og øvde kvar torsdag fram mot arr. som skulle gjennomførast 19. desember. Då det var så få som møtte på øvingane, valde vi å takke nei til 19. des. Dette arr. vart likevel avlyst då alle offentlege arr. vart avlyst framunder jul.

Vi har også hatt besøk av Soul Children-Besta, som har kome med herleg kveldsmat til oss ca kvar tredje torsdag. Dette blir sett stor pris på.

Februar 2022 Magnhild Endal Husevåg